



UNIVERSITÄTS-
BIBLIOTHEK
PADERBORN

Universitätsbibliothek Paderborn

Monumenta Paderbornensia

Ferdinand <Paderborn, Bischof, II.>

Amstelodami, 1672

Benevolo Lectori S.

urn:nbn:de:hbz:466:1-7830

BENEVOLO LECTORI S.

Finita jam erant hæc monumenta, cùm à Decano, & collegio Cathedrali Osnabrugensi, sèpiùs desiderata Caroli Magni diplomata, & donationum literæ ex arcane tabulario proferuntur, quas ipse Carolus M. propria manu subscriptas, & annulo suo signatas olim Ecclesiæ Osnabrugensi, & Wihoni primo ejus Episcopo dedit. Hæc postquam ad Ferdinandum Episcopum ac Principem Paderbornensem & Coadjutorem Monasteriensem, cum ipso autographo, per Theodorum Henricum de Nehen Canonicum Osnabrugensem & Mindensem, perlatae fuerunt, nihil ille, pro eminenti inter Germaniæ Antistites ac Principes doctrina, acceptius, nihil, pro singulari antiquitatis cognitione ac studio, antiquius habuit, quæm ut ab omni mendo purgatas publicæ luci, & communi bono impertiret. Ac licet secundi diplomatis autographum vetustate exoletum, lœsum etiam alicubi fuerit, ita tamen, ut legi potuerit, integrum mansit, majorque labor fuit, in prisco ævi illius charactere enodando. Quo in genere cùm ipse Princeps apprimè versatus esset, faciem lectioni accedit, adhibitusque testibus viris eruditis, utrumque diploma suæ integratæ ac fidei reddidit. Primum Ertwinus Ertmannus interpolatum tantummodo, mutilumque in suo Chronico Osnabrugensi tradit, alterum nec ipse, nec Crantzius, nec Miræus aliique tam exactum dedere, quæm hic ex ipso autographo iisdem planè verbis editum legitur. Cæterum duplex horum diplomatum publicandorum causa fuit. Altera, ut quæ in monumentis saltus Teutoburgiensis, & deserti Sendæ, de Osnecko & Sinedi memorantur, hic benevolus Lector certius cognoscat. Altera ut Caroli M. liberalitas ac munificencia erga primos Saxoniæ Episcopos testatior fieret. Nec enim desunt humani seculi scriptores, in primis ex adversa religione Gryphiander tract. de Weichb. c. 9. Winckelmann lib. 2. de Not. Saxon. veteris. c. 5. & 9. aliisque post Lehmannum in Chron. Spirensi lib. 3. qui, ut jurisdictionem Episcoporum, eorumque Regalia jura convellant. aut ab Ottone M. primùm communicata persuadeant, Caroli M. diplomata supposititia, adulterina, & à Catholicis scriptoribus malâ fide obtrusa, quin omnia Caroli M. privilegia nullibi, nisi in jactatione vulgi extare, temerè audent asserere. Inter quæ cumprimis reputant diploma Caroli M. Ecclesiæ Bremensi datum, recitatumque ab Adamo Bremensi in historia sua. Extat & Ferdensis Ecclesiæ diploma similis propè formæ, ac fidei à Carolo M. consignatum; utrumque, veri fiduciâ, ad ingressum initiumque monumentorum suprà allatum est. Neque aliud serè obtendunt adversarii, quæm quodd annus Incarnationis Dominicæ contra ævi illius morem adscriptus; qui etsi alienâ manu accesserit, non proinde totum diploma invalidum damnandumve. Certè ea diplomata si, ut hic fit, ex nativo

tivo suo colore, formaque scribendi protulissent, nulla facile dubitatio intervenire posset. Enimvero Osnabrugensis Ecclesiae diplomata, quæ hic vides, aut fidem obtinent, aut nullæ humana fides ex Cæsarum tabulis asserta valere debet. Leget igitur h̄ic prudens antiquitatis æstimator ampla Episcopi bona, & privilegia, omne Regale, vel Sæculare judicium in subiectos sibi homines eidem donatum, & perpetuan de Regia potestate confirmatam absolutionem. Hic adversarii, qui tam iniquis oculis Sæcularem ac Regalem Episcoporum jurisdictionem aspiciunt, gratum fecerint, si antiquiora, aut his similia à Carolo M. sacerdibus Principibus donata privilegia in medium attulerint. Haud interim dubium, quin reliquias Saxoniae Episcopis, primæ donationum tabulae, pari formâ & liberalitate, iisdemque privilegiis à Carolo M. datae, & consignatae fuerint, quas aut temporum injuria subtraxit, aut vetustas abolevit, nisi inter tabularia adhuc pressæ teneantur. Porro hæc monumenta concludere non ante visum fuit, quam & hoc Carolinæ liberalitatis monumentum cæteris haud ignobilius accederet, & ad posteritatis memoriam consecraretur. Accedit postremum Capitulatio Caroli M. de partibus Saxoniae, hactenus irreperta, neque ab Ansegiso, neque à Benedicto Levita inter Capitularia Caroli relata. Hanc primum Ferdinandus Princeps & Paderbornensis Episcopus, dum Romæ versaretur in aula Alexandri VII. Pontificis, ex Vaticana bibliotheca eruit, communicavitque cum eruditis & amantibus antiquitatum viris, ex quorum numero H. Conringius, vir in omni doctrinarum genere celebris, ac Julij Academiæ lumen, eam libro suo de orig. jur. Germ. vulgavit. Verum quia nova metalli vena detecta ad repertoris etiam laudem pertinet; auctor quoque hujus operis, h̄ic suis accensuit. Monumentum vel eo cæteris adjungendum, quodd triplicem Saxoniae divisionem in Westfaliam, Angariam & Ostfaliam suis nominibus exhibeat, intersuerintque à Carolo evocati ex his provinciis proceres, quorum consensu hæ leges sanctitæ sunt. Discet præterea ex his Lector Christianæ religionis initia, proscriptamque ex Saxonia veterem populi superstitionem. Nec deerint fortasse, quod expetimus, qui pro meliori otio & ingenio commentariis illustraturi sint.

P.R.I.

